

**Recurso nº 22/2019****Resolución nº 26/2019****RESOLUCIÓN DO TRIBUNAL ADMINISTRATIVO DE CONTRATACIÓN  
PÚBLICA DA COMUNIDADE AUTÓNOMA DE GALICIA**

En Santiago de Compostela, a 30 de xaneiro de 2019.

VISTO o recurso especial en materia de contratación interposto por D.<sup>a</sup> R.B.R.G. actuando en nome e representación de ESPINA & DELFIN, S.L. contra o acordo da mesa de contratación de data 26 de decembro de 2018 polo que se propón adxudicatario da licitación, polo Concello de Soutomaior, dun contrato de xestión do servizo público, baixo a modalidade de concesión, do abastecemento de auga potable e saneamento dese concello, expediente SP 1/2018, o Tribunal Administrativo de Contratación Pública da Comunidade Autónoma de Galicia (TACGal, en adiante) en sesión celebrada no día da data, adoptou, por unanimidade, a seguinte Resolución:

**ANTECEDENTES DE FEITO**

**Primeiro.-** Polo Concello de Soutomaior convocouse a licitación do contrato de xestión de servizo público, baixo a modalidade de concesión, do abastecemento de auga potable e saneamento dese concello, expediente SP 1/2018, cun valor estimado declarado de 11.745.043 euros.

Tal licitación foi obxecto de publicación no BOE o 08.03.2018; no DOUE o 09.03.2018 e na Plataforma de Contratación do Sector Público o 11.04.2018.

**Segundo.-** O expediente da licitación recolle que a mesma estivo sometida ao texto refundido a Lei de contratos do sector público aprobado polo Real decreto lexislativo 3/2011 do 14 de novembro.

**Terceiro.-** A recorrente impugna o acordo da mesa de contratación de 26.12.2018 que inclúe a proposta de adxudicación a VIAQUA (GESTIÓN INTEGRAL DE AGUAS DE GALICIA, S.L.) da referida licitación.

**Cuarto.-** O 17.01.2019 ESPINA & DELFIN S.L. interpuxo recurso especial en materia de contratación, a través do formulario telemático existente a tal fin na sede electrónica da Xunta de Galicia, con enlaces cara a mesma na web deste Tribunal.

**Quinto.-** Con data 18.01.2019 reclamouse ao Concello de Soutomaior o expediente e o informe ao que se refire o artigo 56.2 da Lei 9/2017, de 8 de novembro, de contratos do sector público (en adiante, LCSP). A documentación foi recibida neste Tribunal o día 28.01.2019.

**Sexto.-** O 28.01.2019 o TACGal acorda a medida cautelar de suspensión.

**Sétimo.-** Examinado o expediente administrativo, e ao estarmos nun suposto do artigo 55 LCSP, procedeu ditar a presente Resolución.

## FUNDAMENTOS DE DEREITO

**Primeiro.-** Ao abeiro do artigo 35 bis. 5 da Lei 14/2013, de 26 de decembro, de racionalización do sector público autonómico, corresponde a este Tribunal a competencia para resolver este recurso.

**Segundo.-** En virtude do disposto na Disposición Transitoria Primeira.4 LCSP o presente recurso tramitouse conforme os artigos 44 a 60 da Lei 9/2017, de 8 de novembro, de contratos do sector público, e, no que fose de aplicación, polo Regulamento dos procedementos especiais de revisión de decisións en materia contractual aprobado polo Real Decreto 814/2015, de 11 de setembro.

**Terceiro.-** Resulta necesario analizar o acto que se impugna, que é o acordo da mesa de contratación do 26.12.2018 que recolle:

*“1º.- Aceptar e asumir o informe emitido polo equipo técnico, no expediente de contratación mencionado, no que se entende xustificada a viabilidade das ofertas de VIAQUA, ESPINA & DELFÍN e FCC AQUALIA, asignando ás entidades admitidas as seguintes puntuacións: (aquí insire o cadro correspondente).”*

2º.- De conformidade coa puntuación asignada ás ofertas CLASIFICAR as licitadoras no seguinte Orde:

(...)

*“3º.- Propoñer ao Pleno do Concello a adxudicación do contrato de xestión do servizo público, baixo a modalidade de concesión, que ten por obxecto o abastecemento de auga potable e saneamento do Concello de Soutomaior a VIAQUA (GESTIÓN INTEGRAL DE AGUAS DE GALICIA, S.L.) por ser a oferta económica máis ventaxosa.”*

O recorrente é consciente disto pois xa o seu escrito o titula: *“ASUNTO: Recurso especial en materia de contratación frente al Acuerdo de la Mesa de contratación de fecha 26 de diciembre de 2018, por la cual se propone como adjudicatario a VIAQUA GESTIÓN INTEGRAL DE AGUAS DE GALICIA, S.L.”*

Cómpre analizar entón, se esa actuación impugnada, a proposta de adxudicación, é un acto susceptible de impugnación independente a través do recurso especial en materia de contratación.

O artigo 44.2.b LCSP dispón que poderán ser obxecto do recurso especial *“Os actos de trámite adoptados no procedemento de adxudicación, sempre que estes decidan directa ou indirectamente sobre a adxudicación, determinen a imposibilidade de continuar o procedemento ou produzan indefensión ou prexuízo irreparable a dereitos ou intereses lexítimos. En todo caso considerárase que concorren as circunstancias anteriores nos actos da mesa ou do órgano de contratación polos que se acorde a admisión ou inadmisión de candidatos ou licitadores, ou a inadmisión ou exclusión de ofertas, incluídas as ofertas que sexan excluídas por resultar anormalmente baixas como consecuencia da aplicación do artigo 149”*.

No suposto examinado, o resolto pola mesa de contratación no sentido de propoñer a adxudicación do expediente de contratación, non é de por si un acto que produza indefensión ou prexuízo irreparable aos dereitos e intereses lexítimos. De feito, tal proposta require dunha ulterior decisión do órgano de contratación (no mesmo sentido, Resolución TACGal 32/2018 ou 129/2018), a cal incluso non ten que ser coincidente con aquela proposta, polo que só aí existe un acto de adxudicación, sobre o que cuestionar o que se estime respecto que a mesma recaia en determinada oferta.

En consecuencia, sen prexulgar ningún outro aspecto desta acción impugnatoria, con base no establecido no artigo 55.c) LCSP procede xa declarar a inadmisión deste

recurso especial por impugnar un acto non susceptible de recurso, en base ao artigo 55, que establece:

*“O órgano encargado de resolver o recurso, tras a reclamación e o exame do expediente administrativo, poderá declarar a súa inadmisión cando constar de modo inequívoco e manifesto calquera dos seguintes supostos:*

*c) A interposición do recurso contra actos non susceptibles de impugnación de conformidade co disposto no artigo 44.”*

Unha vez declarada a inadmisión do recurso, non procede seguir examinando ningún outro aspecto de admisión ou de fondo do recurso formulado.

Por todo o anterior, vistos os preceptos legais de aplicación, este Tribunal, en sesión celebrada no día da data, **RESOLVE:**

1. **Inadmitir** o recurso interposto por ESPINA & DELFIN, S.L. contra o acordo da mesa de contratación de data 26 de decembro de 2018 polo que se propón adxudicatario na licitación, polo Concello de Soutomaior, dun contrato de xestión do servizo público, baixo a modalidade de concesión, do abastecemento de auga potable e saneamento dese concello, expediente SP 1/2018.

2. Levantar a suspensión acordada no seu día.

3. Declarar que non se aprecia temeridade ou mala fe na interposición do recurso, polo que non procede a imposición da multa prevista no artigo 58.2 LCSP.

Esta resolución, directamente executiva no seus propios termos, é definitiva na vía administrativa e contra a mesma cabe interpoñer recurso perante a Sala do contencioso-administrativo do Tribunal Superior de Xustiza de Galicia, no prazo de dous meses, a contar desde o día seguinte á notificación desta resolución, de conformidade co disposto nos artigos 10.1.k) e 46.1 de la Lei 29/1998, de 13 de xullo, reguladora da xurisdición contencioso-administrativa.